



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Semináriu Rejionál Suai-Covalima

22 Maiu 2019

JSMP realiza semináriu Rejionál iha Munisípiu Covalima: Administradór Munisípiu Covalima Programa hanesan ne'e prezisa kontinua

Iha 17 Maiu 2017, JSMP realiza semináriu rejionál iha Munisípiu Covalima kona-ba “*Kna'ar Órgaun Seberanu, Partisipasaun Públiku iha Prosesu halo Lei no Asesu ba Justisa Formál Timor-Leste*”. Semináriu rejionál ne'e, loke direktamente hosi Administradór Munisípiu Suai-Covalima, Sr. Afonso Nugeira Nahak.

Sr. Nahak, iha ninia intervensaun agradese tebes ba JSMP tanba kontinua halo program ida-ne'e hodi konvida autór judisiáriu sira bele mai fahe informasaun kona-ba Tribunál, Ministériu Públiku no Defensór nia servisu, hanoin katak ida ne'e importante tebes, tanba ne'e nia rekomenda ba JSMP atu programa sira hanesan ne'e bele konvida mós parte Polísia, nune'e ita bele rona sira nia hanoin tanba iha kazu balu eземplu kazu oho Administradór Postu Zumalai ate agora seidak iha serteza loloos.

Aleinde ne'e, nia mós husu atu JSMP kontinua programa sira hanesan ne'e iha futuru tanba programa ne'e fasilita comunidade sira bele direktamente hato'o sira-nia preokupasaun liuliu iha relasaun ho sira-nia direitu ba hetan justisa ida ne'ebé justu no lais.

Partisipante sira ne'e mai hosi Suku Matai no Suku Maudemo, inklui xefe suku no delegada feto-sira, membru konsellu sira no lia-nain sira. Partisipantes sira ne'e kompostu hosi representante suku 10 hosi Postu Administrativu Tilomar, Munisípiu Covalima no Postu Administrativu Maukatar, Munisípiu Covalima, inklui Komunitade LGBTI husi Munisípiu Covalima no Bobonaro. Total partisipante sira hamutuk ema na'in 35 ne'ebé kompostu hosi feto na'in 16 mane 11 no comunidade LGBTI na'in 8.

Oradór sira iha semináriu ne'e mai hosi representante Tribunál Suai, Ministériu Públiku, Defensória Públiku no sosiédade sivíl (JSMP). Tribunál representa hosi Meritisímu juís Dr. Argentino Luiza Nunes, ne'ebé ko'alia kona-ba kna'ar tribunál iha admnistra justisa tuir Konstituisaun no Lei sira: Susesu no Progresu.

Ministériu Públiku representa hosi Dignísimu Prokuradór Dr. José Elu ne'ebé ko'alia kona-ba kna'ar Ministériu Públiku atu representa vítima feto no labarik sira tuir Konstituisaun no Lei sira: Progresu no dezafiu sira no Defensória Públiku representa husi Exelénsia Defensór Dr. Abilio de Jesus ne'ebé ko'alia

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795

www.jsmp.tl

luis@jsmp.minihub.org

Facebook: www.facebook.com/timorleste.jsmp

Twitter: @JSMPtl

kona-ba knaar Defensór Públiku atu fornese assisténsia legál ba ema kbiit laek sira: Progresu no dezafiu sira.

Enkuantu, sosiédade sivíl representa hosi José Perreira, Coordenador Unidade Observasaun Parlamentár ne'ebé ko'alia kona-ba demokrásia, knaar órgaun soberanu no partisipasaun públiku iha prosesu halo lei no asesu ba justisa formál: faktu no realidade.

“Atividade ne'e hanesan komitmentu ida husi JSMP hodi apresenta deskobrimentu sira ne'ebé JSMP deskobre liuhusi monitorizasaun iha Parlamentu Nasionál no Tribunál, nune'e mós hanesan prosesu ida atu fasilita interasaun direta entre comunidade sira hodi hato'o sira-nia preokupasaun ba autoridade judisiáriu sira”, dehan Diretór Ezekutivu JSMP, Luis de Oliveira Sampaio.

Semináriu ne'e ho objetivu atu promove servisu no funksionamentu setór justisa nian atu asegura ema hotu-hotu asesu ba justisa ida ne'ebé justu no fornese hanoin ba promove no asegura kondisaun no facilidade sira ne'ebé apropiadu no adekuaudu ba instituisaun no autór relevante sira setór justisa nian.

Kestaun ne'ebé partisipante sira foti mak kona-ba atuaun polisia sira ne'ebé la respeita prinsipiu direitu umanu, kestaun sira kona-ba kazu balu ne'ebé laiha koñesimentu husi xefe suku; kazu omisídiu no arguidu halai lakon to'o tinan barak mak depois kaptura serake tuir lei sei bele prosesu; kazu abuzu seksuál hasoru labarik ho idade menór. Nune'e mós partisipante sira husi comunidade LGBT mos hatoo sira nia preokupasaun iha relasaun ho tratamentu ne'e diskriminativu husi Polísia hasoru comunidade LGBT.

Relasiona ho pergunta hirak ne'e, Dr. José Elu, Xefe Prokuradór Distritál Suai nian esplika katak iha relasaun ho atuaun polisia nian ne'ebé dala barak halo atuaun sempre ho violénsia. Maibé tuir lei, krime lei ne'e aplika ba ema hotu. Bainhira membru polisia ruma mak iha nia atuaun ho violénsia ne'e krime tanba ne'e tenke halo keixa ba iha Ministériu Públiku atu prosesu tuir lei. Aleinde ne'e se atuaun ne'e envolve violasaun direitu umanu nune'e bele halo keixa ba iha Provedoria dos Direitu Umanu no Justisa (PDHJ).

Iha relasaun ho kazu balu ne'ebé laliu husi xefe suku, Juis Tribunál Suai, Dr. Argentino Luiza Nunes esplika katak iha prosesu krime públiku ida ne'e, se de'it mak hatene kona-ba krime ruma akontese bele halo kedas denúnsia ba autoridade competente. Ida-ne'e la depende ba keixa, signifika katak bainhira krime ne'e akontese se de'it mak hatene ka haree iha obrigasaun atu halo denúnsia, tanba ne'e mak dala ruma iha kazu barak mak laiha koñesimentu xefe suku sira-nian. Enkuantu kona-ba krime semi públiku ne'e depende ba keixa, signifika bainhira kazu ne'e akontese ne'e depende keixa husi vítima, bainhira vítima hakarak rezolve de'it iha prosesu mediasaun no dame malu, ida ne'e la persiza too iha Tribunál.

Kestaun no preokupasaun husi LGBT nian, Xefe Prokuradór Distritál Suai esplika katak, tuir lei ema hotu hanesan sein halo diskriminasaun hasoru ema ruma inklui comunidade LGBT. Bainhira comunidade LGBT sira sente katak ema ruma halo diskriminasaun no viola comunidade LGBT sira-nia direitu, lei garante atu halo prosesu hasoru membru polisia ka sidadaun se de'it mak envolve. Prosesu ba LGBT sira hanesan ho sidadaun sira seluk, bainhira krime ne'e envolve membru Polisia sira bele direita halo keixa ba iha Ministeriu Públiku.

Iha parte seluk Juis Dr. Argentino Luiza Nunes, iha nia intervensaun, subliña katak JSMP iha papel ne'ebé importante hodi tau-matan ba servisu tribunál nian no publikasaun sira JSMP nian iha kredibilidade aas tanba prodús bazeia rezultadu peskiza no monitorizasaun ida-ne'ebé independente.

JSMP espera katak programa sira hanesan ne'e sei fornese referénsia ne'ebé útil no réal ba xefe suku ho nia estrutura inkui comunidade sira nomós comunidade LGBT sira iha prosesu demokratizasaun no prosesu justisa formál iha Timor-Leste.

Programa ne'e realiza tanba hetan apoiu finansieru hosi Guvernu Australia iha Timor Leste.

Atu hetan informasaun kle'an liu tan favór kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
Website : <http://jsmp.tl/>